

Poemas de niños

Chusé Antón SANTAMARÍA

A fornigueta roya

¿Ta dó bas
fornigueta
tan abentada?

Miá que t' esgarrarán
as punchas
a saya colorada.

To'l día carriando
como as dueñas
de casa.

Friquia y refitolía,
paize tocada
de perlesía.

¿Y qué quiés
que faga?
Como ha plebito
a manduca
s'ha acabau
y tiengo o forniguero
cuasi esculau.

A fornigueta
ye culudeta
y bandía con rasmia
a fonsereta.

Si paras cuenta
no pué parar quieta.

Luenga & fablas, 2 (1998)

Os cachapez

De una pintacoda
salen
de o cado.

Bulquetiando
chugan y s'encorren
por o marguinazo.

Se posan,
debantán as patetas
y oloran.

Como as orellas,
como un fuso tiesas,
sienten y atisfan.

Mobiendo a codeta
rosigan
un troncher
de corrotiella.

Con os mozez
de a escuela
ferían mil brincos
y golteras.

As grallas

¿Qué ye ixe
mascarón
que escarcallía
por o zielo?

Son as grallas
que ban
de os terreros
ta os panizos.

¿Ferán casorio,
ferán baltizo?

O cadillo pastor

A perra de lolo
tié un cadiller;

toz os días l'amuestra
o suyo quefer.

Li diz lolo
que no ye o mismo
chugar que soltar.

Con as obellas
y con as crabitas
chuga a esconderetas
y a bier si me pillas.

Y en bez de replegar
con os mardanos
se claba a torziar.

Ya lo diz lolo:
con iste cadillo,
menudo chandrió.

O cochín escoscau

En a cuadra de Chorche,
o cochiner rosa,
no creigaz que mincha
cualsiquier cosa.

Coflau en a mesa y en a silleta,
eslige o menú de o día,
tié cullara y serbilleta
y no quié bazía.

O cochiner de Chorche
dimpués de a lifara,
s'ita un reglote.

As obellas de Chuan

As obellas de Chuan
por a sanmígalada
baxan de a montaña.

Como son chobenetas
leban os corderez
a encoliquetas.

Luenga & fablas, 2 (1998)

Por a primavera
as obellas de Chuan
se'n ban de a ribera.

Ixo de biachar
lis fa muito goyo,
lis cuaca asabelo
ir-se-ne de pachariqueo.

Gosan de cantar
as mosicas nuebas
y colgan os pósters
en as parideras.

Por as cabañeras
ban ziegas modorras
si sienten en o arradio
a os cantantes de moda.

O chabalín fozín

O chabalín
fozio
ye un goludo
y un angluzioso.

Ye primo de o cochín,
de mal caráuter
y muito morro.

S'esbolutra en o bardo
porque no tié bañera
y s'arrasca en os árbols
a meliquera.

Como ye cucufate,
si lo bies benir
a o trote
¡bes-te-ne ascape!

A zenticalla y a grilleta

Tañe l'acordión
cuan preta o sol
y la escaforaza.
Dios l'ha mandau
aparar a meyodiada.

Ye o quefer
de a zenticalla.

Canta como denguna,
sólo sale con a luna.

Ye a reina
de a nuei
y de a fresqueta:
a grilleta.

No las guiparás
anque te beigan;
abientan os silenzios,
aduermen as penas.

Sólo bels intes
cantan a dúo
y se siente a musica
millor de o mundo.

A misina manzia

Se'n ba de o canto
de o fogaril
ent'a solana.

Se pasa os días
entre sopas
y clucadas.

Ye una misina
que no sabe
fer fainas.

No se gana
ni a lana
de a almada.

Si bi ha cheladas
se'n puya por as camas,
y cuan sonía
chuga con os ratons
a pitos y a moñas.

As ratas ban
por a casa
como si sesen dueñas.

Luenga & fablas, 2 (1998)

Amos, que o forau
de a puerta
no ye gatera,
que ye ratonera.

O raboso escodau

O raboso ye triste
y ploriconiando;
de o cado
no quíe salir,
pus fer-os cargo:
por papabieco
y descuidiau
un cambión a coda
l'en ha tallau.

Se l'arrien os chordos,
s'escocotan as grallas
y s'inflan de goyo
as picarazas.

Como tié muita
estruzia,
a un mesache moderno
l'ha amprau
a suya.

O raboso, de nuebas,
ba bien farchau,
un pendiente
en a orella
s'ha acotraziau
y con a coda
bien pincha
marcha escapau.

Sagardianeta

¿Por qué t'esmoscas,
si no más biengo
a bier-te?

No te cal escapar;
mal no quió
fer-te.

Tú, que no sabes
o que ye
o tiempo,
aduya-me a tastar
os intes
de sol,
de soledá
y de silencio.

O chordo kamikaze

En o puro
ibierno
ba por o cobalto
de o zielo.

O chordo
kamikaze
ye muerto
de fambre.

Furiquiando
en as boiras,
cai enfilau
como una pedregada
en as oliberas.

Li cuacan asabelo
as olibas negras.

Si se'n bien
con a colla
u con a bandada
se dan güena
fartalla.

Se i quedan
esboldregadas
as oliberas.